

Whakahaeretia ana he raro-komiti hei tirotiro i nga kaupapa e whai oranga ai te Pihopatanga mo nga Maori.

I runga i nga whakamarama, ehara i te mea mo nga kaupapa tawhito tenei tirotiro, kei te marama hoki era, engari ko etahi huarahi hou hei whakapiki i nga tikanga nunui e pa ana ki te Pihopatanga hou. Na Wiremu Kingi te motini, na W. H. Panapa i tautoko:—

Kia whakaritea ko A. T. Ngata raua ko P. Peneti hei komiti tirotiro i nga huarahi moni mo te Pihopatanga hou.

Paahitia ana.

I whakamutua te Hui ki te kupu inoi.

(I tae mai nga whakaatu a Rev. Hori Raiti, Hemi te Paa, Rev. P. Tamahori, me Hori Tupaea whakaatu i te pouri mo te kore e watea ki te haere mai ki te Hui, i nga mate.)

IRAIA KARAUARIA.

E tata ana te perehi o ta tatou pepa ka tae mai te rongo kua mate tenei kaumatua rongo nui o roto o Heretaunga, ara a Iraia Karauria.

He tungane ia ki a Airini Tonore i mate atu ra i era tau. He kaumatua rangatira, rangatira nga toto, rangatira hoki nga whakahaere. He wairua ngawari rawa tona, kaore e rangona he kupu taunaha mana, e manae ai te tangata. He kaumatua manaaki i ona iwi, i ona hapu. Haere e koro, haere ki te kainga, haere ki te iwi. Kei te manawapa mou ka haere nei, i te mea ka ngaro i te tirohanga atu a o mokopuna tena momo rangatira te ngawari, te manaaki, te aroha. Haere ki tou okiokitanga.

TAMAITI A REV. PINE TAMAHORI.

He nui te aroha ki to tatou hoa ki a Pine Tamahori me tona hoa wahine me ta raua whanau, mo te rongo kua tae mai, kua mate ta raua tamaiti tane matamua. I Te Aute Kareti taua tamaiti e kura ana, a i riro hoki etahi paraihe i a ia i te tau ka huri nei. Ko nga tau o te tamaiti nei kei te 14, 15 ranei. He tamaiti pai, humarie, whakarongo ki ona kai-tohutohu. I tumanakohia tera e tipu tenei tamaiti hei kai-arahi, hei maramatanga mo ona hapu. Kaati, ano he putiputi ataahua, kua katohia e to tatou matua i te wahi ngaro. Otira e kore e wareware te kakara o te putiputi nei i nga whanaunga, i ona hoa hoki i te kura.

Kua tae ia ki te maramatanga, ki reira kukume atu ai i o tatou hinengaro, ki te wahi e kua ai tatou he tangata whenua.

Ko te mate o te tamaiti nei he meningitis. Kua pangia e taua mate i te Hinota o Aotearoa i tu ai ki Ohinemutu. Kotahi wiki i muri mai i te Hui ka moe nei.